

NO. SOALAN : 50

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' SERI ABDUL HADI BIN AWANG
(MARANG)**

TARIKH : 16 MEI 2016 (ISNIN)

NO. SOALAN :

Dato' Seri Abdul Hadi Bin Awang (Marang) minta PERDANA MENTERI menyatakan sejauh mana Kerajaan bersedia melaksanakan cadangan yang dikemukakan oleh Jawatankuasa Konsultatif Nasional Mengenai Pembiayaan Politik (JKNMPP) dan apakah tindakan Kerajaan terhadap cadangan penambahbaikan proses pilihan raya yang dikemukakan oleh Jawatankuasa Pilihan Khas Parlimen Berhubung Penambahbaikan Proses Pilihan Raya (PSC).

**JAWAPAN: YB DATUK PAUL LOW SENG KUAN
MENTERI DI JABATAN PERDANA MENTERI**

Tuan Yang di-Pertua,

Sewaktu pengumuman penubuhan JKNMPP pada 14 Ogos 2015, YAB Perdana Menteri telah menyatakan bahawa cadangan yang bakal dikemukakan oleh JKNMPP kelak akan dilaksana dan dikuatkuasakan sebelum Pilihan Raya Umum ke-14.

Namun begitu, Kerajaan akan meneliti dan mengkaji secara terperinci setiap cadangan yang bakal dikemukakan supaya ianya selari dengan Terma Rujukan yang telah diberikan kepada JKNMPP. Selain itu, implikasi dari segi perundangan dan kos turut akan dikaji secara mendalam sebelum sebarang cadangan oleh JKNMPP dapat dilaksanakan kelak.

Untuk makluman Ahli Yang Berhormat, secara keseluruhannya terdapat 22 syor Jawatankuasa Pilihan Khas Berhubung Dengan Penambahbaikan Proses Pilihan yang diluluskan oleh Dewan Rakyat pada 3 April 2012 untuk dilaksanakan oleh Suruhanjaya Pilihan Raya (SPR) dan agensi-agensi kerajaan yang berkaitan. SPR telah memaklumkan bahawa sebahagian syor tersebut telah pun dilaksanakan dan sebahagian dalam kajian serta melibatkan pindaan peraturan dan undang-undang.

Sesungguhnya, SPR sentiasa responsif dan menerima secara positif terhadap semua syor-syor, kaedah dan teguran yang telah dibangkitkan, baik sebelum, semasa maupun selesai PRU-13. Bahkan SPR sentiasa melakukan proses rekayasa menerusi usaha pengupayaan dan penambahbaikan dalam pengurusan dan operasinya demi untuk memantapkan lagi sistem pilihan raya, sekali gus demokrasi di Malaysia. Bagaimanapun, ia merupakan suatu proses yang memerlukan SPR merencana kaedah dengan teliti, terperinci dan tersusun. Sebarang usaha tersebut, perlu berpandukan kepada Perlembagaan Persekutuan dan Iunas demokrasi negara. Ini kerana pelaksanaan syor-syor tersebut di samping dibuat mengikut kesesuaian teknologi terkini dan

keperluan semasa, ia juga perlu menepati prinsip perundangan yang sedia ada, sebelum ia dilaksanakan dengan lebih praktikal dan sistematik, agar kelak ia berupaya menjadikan sistem pilihan raya negara yang terbaik, adil dan berwibawa.

Sekian, terima kasih.